

Mida'eci

Yo cecay a romi'ad, micodad ho kako i kwo-syaw i sakatolo a mihecaan, sowal sa ci mama ako, “Kolas, o pipahanhanan anini a romi'ad, tata! talalotok kita a mida'eci.” saan. Lipahak sa kako a pakatengil to pitata ni mama ako i takowanen a talalotok. O sa'ayayaw ho ako a talalotok a mida'eci, away ko fana' aka to pida'eci hananay a demak, nika ira ko mama a mikerid, awaay ko masamaamaanay a harateng no mako, edeng o lipahak no faloco' a malingad. Herek a mihakiwid to piparoan a 'alofo ato nananoman i, malingad to kami a talalotok.

I fatad no lalan, pasifana' ci mama ako, sowal sa, “Kolas, 'arawen kirawan a dateng, o paheko han kiraan. O kakaenen no mita o Pangkah.”saan. Namati:ra, somowal haca ci mama ako, “Arawen Kolas, o dongec kira:wan, Adihay ko ceka, ano miala i, na'onen, macocoka no ceka; o teloc i, manga'ay a kaenen, nika malasapisanga' to maamaan a lalosidang loma' ko 'oway, mato tapila', fasolan, cinaw, sikal, ato faroro^. O roma i, nga'ay malosapisanga' to tatakel ato salo'ec to maamaan ko 'oway.” saan. So'elinay, i fatad no lalan a talalotok, adihay ko mananamay aka to masamaamaanay a kakaenen a dateng; o roma a sowal ningra, sowal sa, “Pina'on tirawan haw! O lidateng kiraan, akaa pitefing. Ano mitefing kiso i,

makalat niira. Caay to ko mamadawa ko falitfit no adada no nikalatan. Latek, caay to kafoti' kiso to dadaya. Awaay ko sapaiyo to matiraay, tolotolo^ a romi'ad, ano eca, cecay a lipay ko adada no nikalatan.” saan. Oarasaka, itini i lalan kako a mafana' to 'orip no to'as, o fenek ato taneng no to'as.

Mata'elif to ko tosa no tatokian, tangasa to kami i katangasaan, sowal sato ci mama ako, “Kolas, ka itini kiso haw, tayra kako titi:raw i faled, aka ka talacowaco:wa. Tayni kako anohoni.”saan. Herek a somowal i, liyas sato cingra a mofaled. Kako sato tono mako, saapaapa^ sa kako a pasafalefaled a minengneng. O folofolo'an itira, nika away ko cecace:cay no da'eci i faled ato i ca'ang no folo'. Sarakarakat sato kako a pasafaled a minengneng, awaay ko cecace:cay makeraay. Caay ka halafin, ini to ci mama ako, matomes ko 'alofo niira to da'eci. Pasowal han aka ci mama ako, “Awaay ko da'eci itini.” han aka. Kekekek sa a matawa, sowal sa, “O maan kinian sa i seraay, ripa'an no miso!” Itiya to kako a mafana', hilam i seraay aca ko da'eci a molengaw.

採箭筈

國小三年級的某天，爸爸說：「今天放假，走！我們上山採箭筈。」沒採過箭筈的我聽了很興奮，雖對採箭筈一無所知，但有爸爸帶，我就只帶著裝箭筈的袋子和水高興地出門了。

途中爸爸教了我很多，他說：「兒子啊！那些是蕨類，那是我們阿美族的菜餚。」不久，他又說，兒子，那叫黃簾，刺很多，採時要小心。簾心可以吃，它的根能用來製作許多器皿，如：平底籃子、晒穀蓆、手提籃子、蓆子及背蘿。還可用來做平床或綁繩。另外，爸爸他特別提醒我，要特別小心咬人狗，別去碰它，如果被它咬了，會全身痛癢，甚至無法入眠，且無藥可治，持續三天至一週。

到達目的地後，爸爸就告訴我：「你在這裡，不要走遠，我到上面去，待會我就回來。」他說完就上去了，留我在原地東看西看，到處是箭竹，但卻找不到箭筈，東找西找就是一根都沒找到。不久，爸爸帶著快滿的袋子回來，我告訴他，這裡沒有箭筈，他笑著說：「這不是箭筈？你都把它踩斷了！」我才知道，原來箭筈是長在地上啊！